

CUSSEGL GROND

Sessiun da zercladur 2023

Incumbensa Epp concernent la priorisaziun da la Porta Alpina en il rom dal pass da cumplettaziun PROSSIV 2040/45

Durant ils ultims dus decennis ha il project Porta Alpina gia superà plirs obstachels. Ils 12 da favrer 2006 han las votantas ed ils votants grischuns approvà – cun ina maioritad impressiunanta da 71,6 % – in credit d'impegn da 20 milliuns francs netto. Ils 19 d'october 2005 ha il Cussegl federal concludì, che la Confederaziun duaja cofinanziar las investiziuns preliminaras per la Porta Alpina cun in import da 7,5 milliuns francs. La regiun Surselva e la vischnanca da staziunament Tujetsch han medemamain contribuì credits considerabels en la summa dad 8 milliuns francs. Ils postulats sin plaun federal sco er chantunal èn tuts vegnids acceptads unanimamain.

Dapi ch'il project è vegnì sistì ils 16 da matg 2012 èn ussa gia passads 10 onns. La Nova lingia da viafier tras las Alps (NVTa) è en funcziun dapi pli che 6 onns. Ils ultims onns han ins pudì obtegnair suffizientamain experientschas tecnicas e da manaschi. Durant quest temp han ils investiders Samih Sawiris e Marcus Weber procurà per ulteriuras grondas investiziuns en la regiun dal Gottard. Er questas investiziuns èn vegnidas sustegnidas cun milliuns da la Confederaziun e dal chantun. Dapi l'onn passà investescha plinavant da nov er l'interpresa americana Vail Resorts en la destinaziun Sedrun-Andermatt. Actualmain vegnan planisads e realisads il ressort da l'entir onn a Dieni/Sedrun ed il nov project d'hotel Acla da Fontauna a Mustér, ils quals vegnan ad effectuar ulteriuras investiziuns da var 250 milliuns francs en la regiun.

Ils 19 da zercladur 2020 ha il parlament grischun acceptà unanimamain l'incumbensa concernent la represa da las tractativas davart la Porta Alpina. En la resposta da la Regenza stevi, ch'ins vegnia – en il proxim pass da cumplettaziun dal Program da svilup strategic da l'infrastructura da viafier (PROSSIV PC 2040/45) – ad inoltrar in project per ina meglra colliaziun da la Surselva e da las regions vischinas e pia gidar a realisar l'idea da la Porta Alpina sco staziun da viafier sutterrana. Viadis svelts da la Porta Alpina en direcziun da Milaun, dal Tessin, da Turitg e da Lucerna augmentian considerablmain en spezial la valur da la regiun dal Gottard e megliereschian la cuntanschibladad generala dal Grischun. Ultra da quai sa laschia l'exclusivitat d'ina Porta Alpina sco indriz d'infrastructura, eventualmain cun attracziun lunsch sur ils cunfins dal Grischun or, sviluppar sistematicamain per l'economia publica. Dapi che l'incumbensa è vegnida inoltrada èn ussa passads 3 onns.

Dapi il 1. da schaner 2016 decida l'Assamblea federala davart ils pass da cumplettaziun da l'infrastructura da viafier. Il parlament federal permetta ils credits d'impegn ch'èn necessaris per quai. Il concept da la purschida per il traffic public en il chantun Grischun cun prioritads e projects respectivs vegn inoltrà da la Regenza. Il concept vegn a vegnir inoltrà ils proxims mais.

Cun la Porta Alpina sco attracziun turistica e/u sco colliaziun da traffic pudessan vegnir dads ulteriurs impuls persistents a la regiun turistica-rurala Surselva ed a la regiun dal Gottard, la finala a l'entir chantun Grischun. In project innovativ da traffic cun attracziun lunsch suror ils cunfins chantunals.

Sin basa da la voluntad dal pievel ch'è vegnida exprimida cleramain ils 12 da favrer 2006, sin basa da la resposta positiva da la Regenza e sin basa da l'acceptaziun unanima da l'incumbensa dals 19 da zercladur 2020 tras il parlament, incumbenseschan las sutsegnadras ed ils sutsegnaders la Regenza da tractar il project Porta Alpina cun la pli gronda prioritad, cura ch'ella inoltescha il concept chantunal da traffic per il proxim pass da cumplettaziun dal Program da svilup strategic da l'infrastructura da viafier (PROSSIV PC 2040/45).

Claustra, ils 15 da zercladur 2023

Epp, Sgier, Kreiliger, Atanes, Bachmann, Bardill, Bärtsch, Baselgia, Bavier, Beeli, Bergamin, Berther, Bettinaglio, Biert, Binkert, Bisculm Jörg, Bleuler-Jenny, Brandenburger, Brunold, Bundi, Cahenzli-Philipp (Vaz Sut), Casutt, Censi, Collenberg, Cramer, Danuser (Cazas), Degiacomi, Della Cà, Derungs, Dietrich, Dürler, Furger, Gansner, Gredig, Heini, Hoch, Hofmann, Hohl, Kaiser, Kappeler, Kocher, Kohler, Lamprecht, Lehner, Loi, Luzio, Maissen, Mani, Messmer-Blumer, Michael Beni (Donat), Michael (Castasegna), Mittner, Peter, Preisig, Rettich, Righetti, Rodigari, Rusch Nigg, Rutishauser, Said Bucher, Salis, Sax, Spagnolatti, Tanner, Tomaschett, Ulber, Widmer, Wieland, Wilhelm, Zanetti (Sent)